

四庫全書

子部

欽定四庫全書

子部

名賢氏族言行類稿卷

三十八至四十

詳校官典籍

臣潘奕雋

主事

臣祁韻士覆勘

總校官進士

臣朱鈴

校對官主事

臣馮培

謄錄監生

臣侯軒

欽定四庫全書

名賢氏族言行類稿卷三十八

宋 章定 撰

尹 六百七十二

姓纂少昊之子封於尹城因氏焉風俗通云師尹三公官也以官為姓周有尹吉甫

漢尹翁歸字子兄河東平陽人文武兼備唯所施設拜東海太守于定國欲屬託邑子兩人與語終日不敢

見其邑子既去謂曰此賢將不可干以私治東海明
察郡中吏民賢不肖及姦邪罪名盡知之縣各有記
籍以高第入守右扶風緩於小弱急於豪強京師畏
其威嚴課常為三輔最在公卿間清潔自守語不及
私甚得名譽於朝廷

酷吏尹齊東郡人以刀筆吏稍遷至御史督盜賊斬伐
不避貴勢

酷吏尹賞字子心鉅鹿人以三輔高第選守長安為虎

穴以大石覆其口收捕姦猾以次內其中百人為輩覆以大石數日一發視皆相枕藉死三輔吏民甚畏之四子皆至郡守長子立為京兆尹皆尚威嚴有治辦名

後漢尹勲字伯元河南人剛毅直方每讀書得忠臣義士之事未嘗不投書而仰嘆桓帝時以有道徵為尚書令

尹敬字幼季習尚書建武中上疏陳洪範消災之術拜郎

蜀志尹默字思潛通諸經史專精左氏後拜諫議大夫
晉載記尹緯字景亮少有大志不營產業每覽書傳至
宰相立勲之際常輟書而嘆姚萇起為佐命元功
唐尹思貞京兆人弱冠以明經第授司府少卿時卿侯
知一亦厲威嚴吏為語曰不畏侯卿杖祇畏尹卿筆
其家坎地獲古戟十二俄而門樹戟時人異焉為青
州刺史治州有績蠶歲四熟黜陟使路敬潛至部嘆
曰是非善政致祥乎表言之

尹知章絳州少時忽夢人持巨鑿破其心內若劑焉驚
悟志思開徹遂徧明六經諸生嘗講授者更北面受
大義轉國子博士性和厚人不見有喜愠子欲廣市樵
米為歲中計知章曰如而計則貧人何以取資

尹元凱坐事免栖遲不出者三十年又有富嘉謨吳少
微等並負文辭時稱北京三傑

宋朝尹洙字師魯河南人兄源字子漸與洙俱以儒學知
名舉進士范仲淹薦其才遂知懷州官至太常博士

卒洙少舉進士為正平簿河南府戶曹邵武軍判官
舉書判拔遷山南東道掌書記知伊陽縣王晦叔薦
其才召試充館閣校勘遷太子中允范仲淹貶饒州
諫官御史不肯言洙上書言仲淹臣之師友願得與
俱貶貶監唐州稅復太子中允知河南縣充經略使
韓琦所深知也沈存中筆談云師魯與一佛者談師
魯自言以靜退為樂其人曰此猶有所係不若進退
兩忘師魯頓若有所得隱凡之日文正來哭之師魯

忽舉頭曰已與公別安用復來死生常理希文豈不
達此乃揖而逝俄頃又舉頭曰亦無鬼神亦無恐怖
言訖長往師魯所養至此可謂有力矣尚未能脫有
無之見得非進退兩忘猶存於胃中歟其孫惇字彥
明以文學行義老於山林

閔 六百七十三

姓纂仲尼弟子閔損字子騫魯人

左襄公二十三年閔子馬曰禍福無門惟人所召為人子

者患不孝不患無所若能孝敬富倍季氏可也

論語德行顏淵閔子騫冉伯牛仲弓

史記閔損字子騫魯人不仕大夫不食汙君之祿

晉薛兼同閔鴻等號五雋張華見之曰皆南金也

後漢侯霸辟仲叔既至不及政事徒勞苦而已仲叔恨

曰始蒙嘉命且喜且懼今見明公喜懼皆去以仲叔
為不足問耶不當辟也辟而不問是失人也

允 六百七十四

允格之後又古允姓之戎居瓜州

隱 六百七十五

吳志有廷尉監隱蕃云魯隱公之後以諡為姓

阮 六百七十六

姓纂殷有阮國在岐渭之間周文王侵阮徂恭見毛詩子孫以國為姓後漢有巴吾令阮敦

晉書阮籍字嗣宗任性不羈方外之士不崇禮典能為青白眼見禮俗之士以白眼對之為步兵校

阮咸字仲容與叔父籍為竹林之遊居道南北阮富而南阮貧七月七日以竿挂大布擯鼻於庭曰未能免俗歷散騎侍郎補始平太守顏延年作五君詠詠咸云屢薦不入官一麾乃出守其子瞻字千里見王戎戎問聖人貴名教老莊明自然其旨同異瞻曰將無同戎咨嗟良久即命辟之時人謂之三語掾字字遙集以金貂換酒時望所歸拜丹陽尹

阮脩字宣子百錢挂杖頭當世富貴不肯顧自得於林

阜之間

阮放字思度遷吏部郎在銓管之任甚有稱績 裕字
思曠以德業知名拜臨海東陽二守及還剡山有肥
遯之志或問其辭徵聘而宰二郡何耶曰雖屢辭王
命非敢以為高也吾少無宦情

阮种字德猷察孝廉為府掾舉賢良擢第一轉中書郎
朝廷咸憚其威容拜南陽太守為政簡惠百姓稱之
南史循吏阮長之字景茂除臨海太守在官常擁敗絮

一生不侮閭室所蒞官皆有風政為後人所思宋世
言善政者咸稱之

文學阮卓薦志經籍尤工五言嘗聘於隋隋文帝夙聞
其名賜遣加禮

隱逸阮孝緒字嗣宗十三徧通五經屏居一室非定省
未嘗出戶呼為居士

宛 六百七十七

姓纂左傳楚有宛春鄭有宛射犬漢有下邳相宛暹

吳興太守宛方

左僖公二十八年子玉使宛春告於晉師曰請復衛侯而封曹臣亦釋宋之圍

襄公二十四年晉侯使張骼致楚師求御於鄭鄭人卜宛射犬吉

苑六百七十八

姓纂狀云殷武丁子受封苑因氏焉或有音怨非也左傳齊有苑何忌

後漢苑康字仲真受業太學後舉孝廉遷潁陰令有能迹遷泰山太守豪姓多不治康至奮威怒施嚴令莫有干犯者

管

六百七十九

姓纂周文王第三子管叔鮮受封於管以國為氏焉今鄭州管城是也齊有管夷吾字敬仲

左僖公二十四年富辰曰昔周公封建親戚管蔡邲霍文之昭也

春秋氏族圖管脩楚賢大夫齊管印之後

莊公八年齊侯使連稱管至父戌葵丘瓜時而往曰及瓜而代

新序楚共王曰管蘇與我處常待我以忠處我以道正我以義其功不細必厚爵之

孟子曰管仲以其君霸管子曰禮義廉耻國之四維

賈誼
策

魏志管寧字幼安詔為大中大夫固辭不受遂下詔曰

寧耽懷道德服膺六經清虛足以侔古廉白可以當
世又王基薦之曰寧含章素質冰潔淵清韜古今於
曾懷包道德之機要 子邈拜郎中後為博士又世
說云嘗與華歆同席讀書有乘軒冕過門者寧讀書
如故歆廢書而看寧割席分坐曰子非吾友也寧歆
邴原三人相善時人號為一龍寧為龍頭原為龍腹
歆為龍尾

方伎管輅字公明善易筮

滿

姓纂風俗通荆蠻有瞞氏音舛變為滿氏漢有滿

昌

魏志滿寵字伯寧為許令時曹洪宗室親貴有賓客
在界數犯法寵收治之洪書報寵寵不聽乃速殺
之立志剛毅勇而有謀後遷為太尉子偉字公
衡以格度知名官至衛尉偉子長武有寵風

罕 六百八十一

姓纂鄭穆公子喜字子罕生子展子展生子皮以王父字為氏子皮名虎

左襄公二十九年鄭子皮以子展之命餽國人粟戶一鍾是以得國之民故罕氏常掌國政以為上卿

昭公六年楚公子如晉過鄭鄭罕虎從鄭伯勞諸祖定公十五年鄭罕達敗宋師於老丘齊魏謀救宋

簡 六百八十二

姓纂左傳晉大夫狐鞠居食采續邑因號續簡伯漢

有簡卿

蜀志簡雍字憲和為從事中郎嘗為談客往來使命拜
為昭德將軍

產六百八十三

國語註云祝產已姓

棧六百八十四

見姓苑 任城魏志有棧潛

典六百八十五

姓纂見風俗通

魏典常形貌魁梧膂力過人太祖引置左右常旣壯武其所將皆選卒每戰鬪常先登陷陣遷為校尉軍中語曰帳下壯士有典君提一雙戟八十斤常子滿為郎中太祖思常拜滿為司馬引自退

雋 六百八十六

姓纂見姓苑渤海漢京兆尹雋不疑

前漢雋不疑字曼倩渤海人治春秋進退必以禮名聞

州郡暴勝之為直指使者至渤海不疑冠進賢冠帶
綬具劔佩環玦褰衣博帶盛服至門上謁勝之望見
不疑容貌尊嚴衣冠甚偉躡履起迎不疑曰凡為吏
太剛則折太柔則廢勝之敬納其戒擢京兆尹京師
吏民敬其威信每行縣錄囚徒還其母輒問不疑有
所平反活幾何人即多所平反母喜笑為飲食言語
異於它時或亡所出母怒為不食故不疑為吏嚴而
不殘

展 六百八十七

姓纂魯孝公子展之後孫無駭生展禽又展喜展莊
叔並其後也

左隱公年無駭卒羽父請諡與族衆仲曰諸侯以字為
諡因以為族官有世功則有官族公命以字為展氏
僖公二十六年齊孝公伐我北鄙衛人伐齊洮之盟故
也公使展喜攜師使受命於展禽

襄公二十九年范獻子來聘公享之展莊叔執幣射者

三耦家臣展瑕展玉父為一耦

扁 六百八十八

史記扁鵲渤海郡鄭人也姓秦名越人少時為人舍長舍客長桑君知其非常人也以禁方傳之號太子死扁鵲生而起之天下盡以扁鵲能生死人

單 六百八十九

姓纂周成王封少子臻於單邑為甸內侯因氏焉襄公穆公靖公二十餘代為周卿士

後漢方術單颺字武宣以孤特清苦自立善明天宮算術舉孝廉遷太史令後拜尚書卒

晉藝術單道開後入羅浮山獨處茅茨蕭然物外百餘歲

圈 六百九十

風俗通云楚鬻熊之後一本云本姓關氏鄭穆公之後秦末為博士逃難改為圈氏

蹇 六百九十一

左傳秦有蹇叔後漢小黃門蹇石風俗通漢有蹇蘭為

交趾刺史

免

六百九十二

左傳衛有免餘亦音問漢有免乙為上郡太守

善

六百九十三

善卷堯時高士見呂氏春秋

衍

六百九十四

風俗通云宋仲衍之後

宰

六百九十五

姓纂周大夫宰孔宰周公之後以官為姓仲尼弟子

宰予字子我魯人也漢司空掾宰直

論語言語宰我子貢

家語宰我有文雅之辭

史記宰予字子我魯人利口辯辭為臨淄大夫

采

六百九十六

黃帝封其子於右平采亭因氏焉

亥

六百九十七

戰國策晉有亥唐

河南官氏志侯亥氏改為亥

改

六百九十八

秦大夫有改產

隗

六百九十九

春秋時翟國隗姓子孫因氏焉

趙

七百

姓纂帝顓頊伯益嬴姓之後益十三代至造父善御

事周穆王受封趙城因以為氏襄盾之後分晉為諸侯都邯鄲王遷為秦所滅子代王嘉嘉子公輔主西戎居隴西

新序晉平公曰善大夫趙武賢臣也相晉天下無兵革者九年

葉公諸梁問樂王鮒曰晉大夫趙文子為人何若對曰好學而受規諫

左僖公二十七年晉作三軍謀元帥趙衰曰卻縠可

文公七年鄆舒問於賈季曰趙衰趙盾孰賢對曰趙衰
冬日之日也趙盾夏日之日也

宣公二年孔子曰趙宣子古之良大夫也

襄公三十年魯使者在晉歸語季武子曰晉未可媮也
有趙孟以為大夫其朝多君子

昭公五年韓起之下趙成魏舒皆諸侯之選也

昭公二十八年趙朝為平陽大夫謂能守業者也

史記平原君趙勝喜賓客賓客至者數千人三去相三

復位封於東武城

趙信以匈奴相國降為翕侯

趙食移裨人也武帝立以主爵為右將軍

南越王尉佗真定人也姓趙氏漢十一年遣陸賈立佗為南越王

酷吏趙禹釐人武帝時以刀筆吏積勞遷為御史與張湯論定諸律令用法益刻

趙奢為趙田部吏收租稅平原君家不肯出奢以法治

奢封馬服君殺平原君用事者九人

見通鑑
報王

子趙括代

廉頗為將蘭相如曰王以名使括若膠柱鼓瑟耳括徒能讀其父書傳不知合變也

趙衰夙之弟也一曰成子字子餘 趙衰以壺飧徑從

餒而弗食 晉謀元帥衰曰說禮樂而敦詩書 趙

盾字孟是曰趙宣子趙衰冬之日也趙盾夏之日也

齊宋衛陳鄭許曹會盾盟於扈趙宣子古之良大

夫也 趙文子晉卿名武字孟父朔是為趙莊子宋

之盟武有仁人之心 趙鞅乃趙簡子一名志父趙武之孫父曰成簡子向子太叔而問揖讓周旋之禮初尹鐸為晉陽請曰以為繭絲乎抑為保障乎簡子曰保障哉 趙無恤晉趙襄子也鞅之子

前漢趙充國字翁孫隴西人沈勇有大略少好將帥之節擢為將軍宣帝問誰可將兵攻羌充國時年七十餘對曰亡踰於老臣願馳至金城圖上方略 明主可為忠言遂上屯田奏條留田便宜十二事成帝

時西羌有警上思將帥之臣乃召楊雄即充國圖畫而頌之東坡先生曰嗚呼使在位君子皆用其心如充國則古今天下豈有不治者哉夫充國之用人臣常道爾然與充國同時在漢庭人未聞皆然而充國獨然故可重也況今之人不及往時遠矣則充國益可重也

趙廣漢字子都涿郡人舉茂才察廉治行尤異守京兆尹遷潁川太守教吏為鈛笥投書相告訐善為鉤距

以得事情銖兩之姦皆知之吏民稱之不容口見事
風生無所回避

儒林趙子河內人事韓生受詩佞幸孝文時宦者則有
趙談

後漢趙憙字伯陽光武拜平原太守蝗入界輒死歲屢
有年百姓歌之拜太尉

趙溫字子柔初為京兆丞嘆曰大丈夫當雄飛安能雌
伏遂棄官去歲飢散家糧以賑窮餓所活萬餘人拜

司徒

趙咨字文楚拜東海相在官清簡計日受奉豪黨畏其
儉節

趙岐字邠卿少明經有才藝遷太僕為副使宣揚國命
所到郡縣百姓皆喜曰今日乃復見使者車騎

趙壹字元叔身長九尺體貌魁梧望之甚偉朝臣莫有
過之者名動京師士大夫想望其風采

趙苞字威豪遷遼西太守抗厲威嚴名振邊俗

方術趙彥

趙典字仲經少篤行隱約博學經書桓帝時四府表薦
拜議郎侍講後遷太常朝廷每有災異疑議輒咨問
云據經正對無所曲折子謙弟溫相繼為三公

儒林趙曄字長君受韓詩嘗著諸納察色讀之嘆息以
為長於論衡還京師傳之學者咸誦習焉

趙孝字長平顯宗素聞其行詔拜長樂衛尉復徵其弟
禮為御史中丞嘉其兄弟篤行詔禮十日一就衛尉

府大官送供具令其相對盡歡剛毅有度轉大司馬
軍師

蜀志趙雲字子龍嘗將數十騎與曹公戰先主曰子龍
一身都是膽也軍中號為虎威將軍

吳志趙達河南人治九宮一筭之術究其微旨至計飛
蝗射隱伏無不中効仕三世不過太史郎

趙至字景真作書陳志云蹴崑崙使西倒蹋太山令東
覆吾之願也議論精辨有縱橫才氣

南史趙倫之字幼成孝穆皇后第事母以孝稱久居方伯范泰戲謂曰司徒公缺必用汝老奴我不言汝資地所任要是外戚高秩次第所至矣子伯符字潤遠累遷徐兗二州刺史劫盜遠迸無敢入境

趙知禮字齊旦陳武帝引為書記每占授軍書下筆便就沉靜有謀謨每軍國大事文帝輒令墨書問之北史趙逸字思羣仕魏歷中書侍郎性好墳典年踰七十手不釋卷兄溫字思恭博學有高名為姚泓天

水太守 子琰字叔起孝心色養能熟之節必親調之趙逸文雅自業琰加之孝義可謂世有人焉

趙柔字元順少以德行本學知名仕魏為河內太守

子默字冲明武威太守 趙柔通涉經史才志不羣

價重四州有聞東國

趙隱字彥深神武補為丞相功曹文翰多出其手稱敏給累遷尚書令歷事累朝常參機近每有引見或升御榻齊朝宰相善始令終惟彥深一人

趙貴字元寶後拜柱國大將軍從兄善字僧慶仕魏

歷左右僕射位居端右愈自謙退時人稱其有公輔量

趙剛字僧慶少機辯有幹能累遷金紫光祿大夫弟

仲卿仕隋拜石州刺史法令嚴猛纖介之失無所寬

捨吏人戰慄無敢違犯盜賊屏息遷朔州總管時人

謂於菟

趙昶字長舒周文以為都督領降羌又破宕昌羌獠二

十餘萬拜武州刺史周文常曰不煩國家士馬而能

威服氏羌者昶有之矣

趙文表累世為二千石志存忠節後遷蓬州刺史政尚
仁恕夷獠懷之

趙肅字慶雍仕周除廷尉卿久在理官執心平允子軌
仕隋為齊州別駕在州考績連最文帝令入朝父老
將送曰別駕在官水火不與百姓交是以不敢盃酒
相送公清如水請酌一盃水奉餞軌受飲之轉壽州
長史開芍陂三十六門灌田五千餘頃人賴其利

趙𩇑字通賢少孤養母至孝年十四有人盜伐其父墓中樹者對之號慟因執送官仕齊為冀州刺史甚有威惠市多姦詐乃為銅斗鐵尺置於肆百姓便之

趙芬字士茂周文引為相府鎧曹參軍歷記室性彊濟所居之職皆有聲績明習故事每朝廷有所疑議輒為評斷莫不稱善

趙綽字士倬仕隋授大理丞處法平允考績連最每有奏讞正色侃然遷大理少卿

趙才字孝才隋時遷右候衛大將軍

儒林趙文深字德本少學楷隸年十一獻書於魏帝除相府法曹參軍筆勢可觀當時題榜皆其迹也

藝術趙輔和少明易善筮為齊神武館客

唐趙弘智河南人永徽初入為陳王師講孝經舌無留語高宗喜曰試為我陳經之要對曰天子有爭臣七人雖無道不失天下進國子祭酒

趙彥昭字真然甘州人父武孟少游獵以所獲饋其母

母泣曰汝不好書而放蕩吾安望哉不為食武孟感激遂力學淹該書記為侍御史著河西人物志十篇彥昭少豪邁風骨秀爽及進士第景龍中遷同平章事

趙憬字退翁渭州人志行峻潔不自銜賈李泌薦之憬占奏明辯貞元中左丞缺帝曰趙憬堪此遂以命之精治常道以國本在選賢節用薄賦斂寬刑罰懇為天子言之又陳前世損益當時之變獻審官六議云

云帝皆然之性清約位台宰而筆室童獲猶儒先生
家也得廩入先建家廟而不營產其鎮湖南也令狐
峘崔倣為部刺史不守法彈治之皆遣客暴慥失
於朝及為相乃擢用峘倣人以為賢

趙宗儒字秉文鄧州人第進士判入等貞元中領考功
事黜陟詳當無所回憚帝善之遷給事中同平章事
文宗召訪政理對曰堯舜之化慈儉而已帝納其言
趙洵冀州人第進士永泰時禁中火近東宮代宗疑洵

以監察御史為巡使檢治明諱迹火所來乃宦人直舍帝在東宮頗德之及治衢不為韓滉所容奏免官帝見其名問宰相曰是豈永泰時御史乎對曰然既至勞之曰卿正直朕所自知乃以罪聞不信也命典吏部趙隱字大隱京兆人擢進士第咸通末進同平章事性仁悌不敢以貴權自處始布衣時家無貲與兄隲同耕以食雖姻宗之富未嘗干以財懿宗誕日宴慈恩寺隱侍母以安輿臨觀宰相方率百官拜恩於廷即

回班通夫人起居縉紳以為榮

五代趙鳳幽州人也少以儒學知名為鄆州節度判官
晉取鄆州莊宗聞鳳名得之喜以為扈鑾學士莊宗
即位拜鳳中書舍人翰林學士莊宗置端明殿學士
以馮道及鳳為之術士周玄豹以相法言人事多中
嘗為明宗言其後貴不可言明宗即位思玄豹以為
神將召至京師鳳諫曰好惡上所慎也今陛下神其
術而召之則傾國之人皆將奔走吉凶之說轉相惑

亂為患不細明宗遂不復召天成四年夏拜同平章
事後安重誨得罪羣臣無敢言者獨鳳數言重誨盡
忠明宗以鳳為朋黨罷為安國軍節度使鳳在鎮所
得俸祿悉以分將校賓客清泰二年卒

趙光逢字延吉以文行知名時人稱其方直溫潤謂之
玉界尺唐亡事梁為中書侍郎同中書門下平章事
累遷左僕射以太保致仕

宋朝趙普字則平幽州薊人也父迴以亂世徙其族常

山又徙洛陽普性沉厚有大略周顯德初永興軍節度使劉詞辟為從事詞卒遺奏薦其才世宗用兵淮甸太祖克滁州以普為軍事判官太祖與語奇之時宣祖將兵抵滁上得疾普躬親藥餌朝夕無倦宣祖媿其情由是待以宗分太祖領定國軍節度使移鎮滑許普皆在幕府最後為歸德軍節度掌書記太祖受禪普以佐命功授右諫議大夫樞密直學士昭憲寢疾普入與顧命拜樞密使初二叛既平太祖

召普問天下自唐季以來數十年間凡易數姓兵革
不息蒼生塗地其故何也普曰唐季以來戰鬪不息
國家所以不安者由節鎮太重君弱臣強而已今所
以治之無他惟稍奪其權制其錢穀收其精兵則天
下自安矣頃之太祖因晚朝與石守信王審琦等飲
太祖屏左右謂曰我非汝曹之力不得至此念汝之
德無有窮矣然天下亦大艱難殊不若為節度使之
樂也守信等曰何故太祖曰是不難知矣居此位者

誰不欲為之守信頓首曰陛下何為出此言今天命已定孰敢有異心太祖曰不然汝曹雖無其心其如汝麾下之人欲富貴者何一旦以黃袍加汝雖欲不為其可得乎守信等曰臣等愚不及此惟陛下哀矜示以可生之塗太祖曰人生如駒過隙所謂好富貴者不過多積金錢厚自娛樂使子孫無貧乏之憂汝曹何不釋去兵權擇便好田宅市之為子孫立永久之業多置歌舞日飲酒相歡以終天年君臣之間兩

無猜忌上下相安不亦善乎於是守信等皆稱疾請
解軍職乾德二年范質等三相罷以普為門下侍郎
同中書門下平章事集賢殿大學士普勸太祖革方
鎮之弊方鎮關帥命文臣權知所在場院間遣京朝
官廷臣監臨諸道置轉運使諸州置通判使主錢穀
自是利歸公上矣又數遣使者分詣諸道選本道兵
驍勇者籍其名送京師以備宿衛教習精練太祖每
御便殿親臨試之才數年兵甲精銳府庫充實皆普

之謀也五年拜尚書左僕射昭文館大學士太祖
嘗夜幸普第立風雪中普惶恐出迎太祖與普飲于
堂中設重裯地坐熾炭燒肉普妻和氏行酒太祖以
嫂呼之普從容問曰夜久寒甚陛下何以出太祖曰
吾睡不能着一榻之外皆他人家也普曰陛下小天
下邪南征北伐今其時矣願聞成算所嚮太祖曰吾
欲取太原普默然久之曰非臣所知也太祖問其故
普曰太原當西二邊則一舉而下則二邊之患我獨

當之何不姑留以俟削平諸國則太原彈丸黑子之地將無所逃矣太祖笑曰吾意正如此特以試卿耳太祖寵待普如左右手判大理寺雷德驤憤其屬附普增減刑名因求見太祖語不遜太祖怒叱之曰鼎鑊尚有耳汝不聞趙普吾之社稷臣乎德驤坐貶方普之在相位也嘗於視事閣坐屏後設二大甕凡中外表奏普意不欲行者必投之甕中滿則束緼焚之以是人多怨者雍熙三年太宗命曹彬等北伐普上

疏切諫曰自古聖帝明王無不置遠敵於度外陛下
何必留意於斯乎陛下典兵北伐驅百萬生靈悉令
輦運使之耕桑失時所得者少所失者多豈陛下之
利耶邪諂之徒進言者曰韋丹時逢幼君災異屢見
可以用武以中陛下之意陛下樂禍求功以為萬全
遂興無名之舉豈不過甚矣哉太宗賜詔褒之上章
告老拜太師封魏國公給宰相俸仍遣其弟宗正少
卿安易齎詔賜之又遣使以璽書賜普曰皇帝問太

師頃以微病懇求致政朕以居守之重慮煩耆耄維
師之命用表尊賢竚聞有瘳與朕相見今遣使撫問
仍賜銅羊上尊酒太師宜愛精神近藥石以副朕眷
注之意焉薨封真定郡王諡曰忠獻子承宗承煦

趙昌言字仲謨汾州孝義人也舉進士真宗幸澶淵
命知河陽歷天雄軍徙鎮州遷吏部侍郎卒昌言喜
推獎後進常薦李沆以為有公輔之器又以女妻王
旦二人皆賢相也

趙槩字叔平應天府虞城人也少孤力學舉進士授將
作監丞神宗立進尚書左丞數求去位以觀文殿學
士吏部尚書知徐州明年以太子少師致仕居睢陽十
五年而卒謚康靖槩為人樂易深中恢然偉人也平
生與人無所怨怒非特不形於色而又專務隱惡揚
善以德報怨出於至誠非勉強者歐陽修坐累對詔
獄槩獨抗章言修無罪為仇人所中傷陛下不可以
天下法為人報仇仁宗大感悟修以故得全人以槩

為長者槩既老修亦退居汝南槩自睢陽往從之游
樂飲旬日其相得如此

趙抃字閱道衢州西安人也少孤貧舉進士為武安軍
節度推官有偽造印者更以為當死抃曰造在赦前
而用在赦後赦前不用赦後不造法不當死遂以疑
讞之卒免死監潭州糧料院歲滿知崇安縣徙通判
宜州以母喪廬于墓三年不宿于家終喪起知海陵
江原二縣還通判泗州入為殿中侍御史彈劾不避權

倖京師號鐵面御史其言常欲朝廷別白君子小人以謂小人雖小過當力排而絕之後乃無後患君子不幸而有註誤當保持愛惜以成就其德故言事雖切而人不厭遷龍圖閣直學士知成都府神宗即位召知諫院及謝神宗謂曰聞卿匹馬入蜀以一琴一鶴自隨為政簡易亦稱是耶抃知神宗將用其言即上疏論呂誨傅堯俞范純仁呂大防趙瞻趙鼎皆骨鯁敢言久遣不復無以慰搢紳之望神宗納其說擢

右諫議大夫參知政事會王安石用事下視廟堂如
無人因爭新法怒其同列曰公輩坐不讀書耳抃折
之曰君言失矣如臯夔稷契之時有何書可讀邪安
石默然熙寧三年以資政殿學士知杭州移越州吳
越大饑民死者過半抃出官廩平其價以糴次諭富
人出粟而以家貲先之民樂從焉告老以太子少保
致仕退居于衢有溪石松竹之勝與山僧野老游不
復有貴勢也居六年卒謚清獻抃和易長厚氣貌清

逸人不見其喜愠年四十九即不御肉自號知非為
吏誠心愛人所至崇學校禮師儒民有可與與之獄
有可出出之治虔與成都尤為世所稱道云子岷亦
篤行君子也嘗為御史論事知治體後為太僕少卿
以卒趙元儒幼聞之子登科為泉州教授聞抃之後
趙瞻字大觀鳳翔盩厔人也父剛太子賓客瞻舉進士
調孟州司戶參軍移萬泉令又知永昌縣築六堰均
灌溉以絕水訟民以比召杜神宗時為開封府推官

神宗問青苗法瞻曰青苗法唐行之於李世擾攘中培民財誠便今陛下欲為長久計愛百姓誠不便出為陝西轉運副使哲宗即位自知滄州召為太常少卿遷戶部侍郎元祐三年以樞密直學士僉書樞密院事明年拜同知樞密院事都水王令圖請復黃河故道朝廷數遣使按行論者不一瞻曰還河之策未有宸論今役徒三十萬用稍木二十萬投於水以僥倖萬一豈計哉卒謚懿簡

趙挺之字正夫密州諸城人也舉進士為登州教授通判德州召試館職除集賢校理遷監察御史初挺之在德州希意行市易法黃庭堅監德安鎮以為鎮小民貧不堪誅求及挺之召試蘇軾曰挺之聚斂小人學行無取豈堪此選至是挺之劾奏軾草麻有云民亦勞止以為誹謗先帝軾上章自辯既而諫官奏故相蔡確作詩訕上而御史不以言挺之謫通判徐州入為御史中丞歷左丞門下侍郎京復相挺之再除

觀文殿學士卒謚清憲

趙隆秦州成紀人也以勇敢應募從王韶收復熙河西
遷為三班惜職姚麟嘗因力戰被重創曰吾渴欲死
得水可活有泉近敵營隆潛往納衣泉中賊覺隆急
持濡衣且戰且歸裂取水以飲麟麟得活嘗從李憲
討賊數有功討鬼章也河外諸羌皆以兵應鬼章隆
率衆先至斧其橋鬼章失援擒之除涇原第九將童
貫與隆論燕雲事隆極言其不可貫曰君與此當有

異拜隆曰武夫豈敢干爵祿以敗祖宗百餘年之盟
好乎異時釁生雖萬死不足以謝天下貫知不可奪
明日白徽宗除知西寧州時又有邊將劉延壽過太
原帥臣方經營燕雲以問延壽延壽以可伐不可守
可守不可久矧祖宗盟誓一旦敗之恐有不測之變
帥甚忌之隆與延壽雖武士甚有精識隆至西寧羌
豪懾伏悉籍其戶三萬六千願比內地

趙尚寬字濟之安仁之子也初補秘書省正字嘗知忠

州以考課第一知唐州時議者言唐土曠民稀賦不足以充役請廢為縣朝廷下其議尚寬非之乃按視圖記得召信臣故迹蓋發卒復三大陂一大渠皆溉田萬餘頃又教民自為支渠數十轉相浸灌而四方之民來者雲集尚寬復請以荒田計口授之及貸民官錢買耕牛比三年廢田盡為膏腴增戶萬餘尚寬勤於農政治有異等之效仁宗聞而嘉之下詔褒焉仍進秩賜金再留尚寬在唐民畫像祠之始王安石

作新田詩以美之後蘇軾自蜀之京師道過唐亦為
作新渠詩五章積官至司農卿以卒

趙隣幾字亞之鄆州須城人也好學能屬文章舉進士
太平興國初知制誥以卒

鮑

七百一

姓纂姒姓夏禹之後有鮑敬叔仕齊食采於鮑氏因
以為氏敬叔生叔牙曾孫國代為齊卿

家語子貢問今之人臣孰賢子曰往者齊有鮑叔鄭有

子皮則賢者也

左成公十七年鮑國去鮑氏而來為施孝叔臣施氏卜
宰有百室之邑與匡句須邑使為宰以讓鮑國而致
邑焉

前漢鮑宣字子都渤海人好學明經舉孝廉為郎何武
薦為諫議大夫後拜司隸以摧辱宰相下廷尉
博士弟子王咸舉幡太學下曰欲救鮑司隸者會此
下諸生會者千餘人

後漢鮑永字君長事後母至孝妻於母前叱狗即去之
後為司隸校尉辟鮑恢為從事恢亦抗直不避強禦
帝嘗曰貴戚且宜斂手以避二鮑子昱字文泉拜
司隸奉法守正有父風後拜汝南太守陂地歲歲坎
壞昱乃作方梁石洫溉田倍多人以殷富昱子德為
南陽太守歲多荒災唯南陽豐穰吏人愛悅號為神父
魏志鮑勛字叔業為中庶子在東宮守正不撓為御史
中丞百寮嚴憚罔不肅然

晉藝術鮑靚字太原五歲記其前生學兼內外明天文
河洛之書為南海太守

南史鮑泉字潤岳博涉史傳兼有文筆為通直侍郎元
帝嘗責之云面如冠玉還疑木偶鬚似蝟毛徒勞繞
喙

鮑行卿以博學大才稱位中書舍人第客卿位南康太
守客卿子正以才藝知名為湘東王佐好交游語曰
無處不逢烏噪無處不逢鮑佐

北史鮑宏字潤身周時為麟趾殿學士後奉使山南為
王謙所執竟不屈節謙敗馳入京隋文嘉之賜以金
帶

儒林鮑季詳甚明禮通左氏春秋仕齊

絞
七百二

左傳絞國在隋唐之南以國為氏

佼
七百三

漢光武時山陽盜長佼强

名賢氏族言行類稿卷三十八

欽定四庫全書

名賢氏族言行類稿卷三十九

宋 章定 撰

馬七百四

姓纂嬴姓伯益之後趙王子趙奢封馬服君子孫氏
馬奢孫興趙滅徙咸陽

前漢馬宮字游卿以射策甲科為郎

後漢馬成字君遷南陽人光武拜為揚武將軍屯常山

中山以備北邊繕治障塞北方無事封金椒侯

馬武字子張南陽人也常為軍鋒力戰無前為人嗜酒
明達敢言面折同列言其短長無所避忌

馬援字文淵扶風人其先趙奢為趙將號馬服君三兄
況余員並有才能皆為二千石援少有大志光武征
隗囂援聚米為山谷指畫形勢拜隴西太守但總
大體諸曹時白外事輒曰此承掾之任何足相煩頗
哀老子使得遨遊拜伏波將軍自請擊匈奴曰男

兒要當死於邊野以馬革裹屍還葬耳 矍鑠哉是

翁 戒子孫不得言人過失 意以見諧 女立為

后子廖方客卿 廖方字敬平以父任為郎又為衛

尉封順陽侯 客卿幼岐嶷六歲能應接諸公專對

賓客援甚奇之以為將相器 在交趾仰視飛鳶跼

跼墮水中 立銅柱為漢界

馬嚴字威卿通左氏春秋交結英賢京師大人咸器異

之 弟敦字儒卿亦知名俱居鉅下三輔稱其義行

號鉅下二卿肅宗拜為中丞後為陳留太守下車明
賞罰發姦慝郡界清靜

馬融字季長扶風人拜校書郎中滯於東觀十年不得
調善鼓琴好吹笛不拘儒者之節養諸生常有千數
常坐高堂施絳紗帳前授生徒後列女樂

蜀志馬超字孟起有信布之勇甚得羌胡心遷驃騎將
軍領涼州牧

馬良字季常兄弟五人並有才名諺曰馬氏五常白眉

最良先主辟為荊州從事至侍中良貞實稱
為令士第謬字幼常戰于街亭

馬忠字德信拜牂牁太守撫育卹理甚有威惠累遷為
鎮南大將軍寬濟有度量忿怒不形於色處事能斷
威恩並立蠻夷畏而愛之

晉書馬隆字孝興少而智勇好立名節自請討羌虜通
涼州拜宣威將軍

南史馬仙理字靈馥少以果敢聞父憂負土成墳手植

松柏每戰恒冠三軍口未嘗言功為義陽太守
累破山蠻郡境清謐

隱逸馬樞字要理博極經史尤善佛經後隱于茅山
北史儒林馬敬德留意春秋左氏齊時試經業問十餘
條並通授國子助教子元熙字長明齊時以孝經
入授皇太子

節義馬八龍輕財重義友人尹靈哲在軍喪亡以家財
殯葬撫其孤遺恩如所生詔表門閭

唐馬周字賓王博州人入關留客汴舍新豐逆旅主人
不之顧周命酒一斗八升悠然獨酌衆異之至長安
舍中即將常何家何武人不涉學周為脩二十餘事
皆當世所切太宗問何何曰此非臣所能家客馬周
教臣言之帝即召之與語帝悅拜監察御史奉使稱
職周上書帝善其言除侍御史又疏奏帝稱善轉
中書舍人周善敷奏機辨明銳動中事會裁處周密
時譽歸之帝每曰我輩不見周郎即思之岑文本謂所

親曰馬君論事會文切理無一言可損益聽之纒纒
令人忘倦蘇張終賈正應耳十八年遷中書令又
帝嘗以飛帛書賜周曰鸞鳳冲霄必假羽翼股肱之
寄要在忠力疾甚取所上章奏焚之曰管晏暴君
之過取身後名吾不為也為司列少常伯與裴行儉
分掌選事言吏部者稱裴馬焉又袁天綱曰馬周伏
犀貫腦背若有負貴驗也贊曰由一介草茅言天
下事明習憲章若素宦于朝以明佐聖君宰不膠漆

而固

馬璘岐州人少孤年二十讀馬援傳至丈夫當死邊野
以馬革裹屍而歸慨然曰使吾祖勲業墜于地乎至
德初王室多難統精甲三千自二庭赴鳳翔肅宗奇
之委以東討初戰衛南以百騎破賊五千從李光弼
攻洛陽史朝義衆十萬光弼曰吾用兵三十年未見
以少擊衆雄捷如馬將軍者吐蕃寇詔璘移軍援河
西璘出戰背城陣輕騎追之斬數千人拜四鎮行營

節度使元日有卒犯盜或曰宜赦之璘曰赦之則人將伺其日為盜遂戮之天大旱為土龍聚巫以禱璘曰旱由政不脩命撤之明日雨大歷年破吐蕃進右僕射扶風郡王武幹絕倫以忠力奮在涇八年繕屯壁為戰守具寇不敢犯為中興將

馬燧字洵美汝州人姿度魁傑長六尺二寸與諸兄學輟策歎曰方天下有事丈夫當以功濟四海詎老一儒哉更學兵書戰策沉勇有筭寶應中李抱玉署

為趙城尉進鄭州刺史勸督農力歲一稅人以為便
徙德州時師旅後大旱燧務勤教化止煩苛秋秬生
于境人賴以濟遷河東節度使教騎士成精卒威鎮
北方言田悅必反既而果圍邢州詔燧與李抱真
等合軍救之燧凡百餘返士皆決死悅大敗以功遷
右僕射時李納李惟岳合兵救悅悅裒散兵二萬壁
洹水燧縱兵擊之悅敗走進北平郡王又李懷光反
河中詔燧為河東等行營副元帥與渾瑊駱元光合

兵討之燧挺身見賊將徐廷光感泣即率衆降渾瑊歎
曰嘗疑馬公能窘田悅今觀其制敵固有過人者河中
平遷侍中還太原帝賜宸宸台衡二銘以言君臣相
成之美勒石起義堂帝榜其額以寵之與李晟皆圖
像凌煙閣

馬總遷安南都護廉清不撓建二銅柱於漢故處以明
伏波之裔

馬植字存之第進士擢制策科開成初為安南都護精吏

事以文雅絢飾其政清淨不煩以政最檢校左散騎
常侍

五代馬希萼知朗州調鄉兵作戰艦攻其兄希廣於潭
州妻范氏諫曰兄弟相攻勝負皆為人笑不聽

宋朝馬亮字叔明其先茂陵人也自其祖韜徙居廬州
遂為合肥人舉進士久除外官亮有治劇才咸平初
命往京西河東二道放積欠奏除者數百萬久之入
為御史中丞請父祖未葬者不許析居以厚風教卒

謚忠肅

馬默字處厚單州武城人也舉進士調臨濮尉治平中為監察御史裏行出通判懷州知登州沙門島舊制囚有定額溢數則投海中若主李慶罷官入謁默遽問擅殺幾何人慶一任數七百餘人默詰之則曰島土地狹徒隸猥衆過數官糧不足以贍則去殺之默責其擅殺欲按其罪慶皇恐即日自殺默為奏請更定配島法凡二十條溢額者則選年深不作過人移

徙登州自是多全活者其後蘇軾起知登州父老迎
於路曰公為政愛民如馬使君乎軾異之徙知曹州
召為三司鹽鐵判官論新法不便出為京東提點刑
獄又為廣南西路轉運副使元祐初召為司農少卿
擢工部侍郎遷戶部侍郎告老除寶文閣侍郎副知徐
州

忠義馬遂開封人也

假七百五

陳留漢有假倉治尚書

治七百六

衛大夫有治厯

賈七百七

姓慕容叔虞少子云明康王封之於賈為晉所滅以國為氏又云本自周賈伯之後

左傳昭公十三年文公好學而不貳生十七年有賈佗以為股肱二十八年晉魏獻子為政以賈辛為

祁大夫謂賈辛有力於王室故舉之

史記賈生名誼雒陽人也年十八以能誦詩書聞於郡
中吳公為河南守聞其秀才名召置門下 文帝召
為博士每詔令議下諸老先生不能言賈生盡為之
對文帝說之超遷一歲中至太中大夫 絳灌之屬
害之出為長沙王太傅 渡湘為賦以弔屈原 陳
治安之策通達國體 召見宣室問鬼神事夜半前
席 帝曰吾久不見賈生自以為過之今不及也

孫賈嘉最好學世其家孝昭時列為九卿

賈山潁川人涉獵書記不能為醇儒孝文時言治亂之道借秦為諭名曰至言

賈捐之字君房賈誼之曾孫上疏言得失待詔金馬門議擊珠厓不便君房下筆言語妙天下

後漢賈復字君文南陽人少好學習尚書事舞陰李生李生奇之曰賈君之容貌志氣如此將相之器殊有折衝千里之威

賈琮字孟堅舉孝廉遷京兆令交趾屯兵反三府舉琮為交趾刺史巷路歌曰賈父來晚使我先反今見清平吏不敢飯拜冀州刺史舊典傳車驂駕垂赤帷裳迎於州界及琮之部升車言曰刺史當遠視廣聽糾察美惡何有反垂帷裳以自掩塞乎乃命御者褰之百城聞風震竦

賈逵字景伯父徽受左氏春秋逵傳父業常在太學不通人間事長八尺二寸諸儒語曰問事不休賈長頭

愷悌多智思倣儻有大節和帝以為侍中內備
帷幄兼領秘書

賈彪字偉節潁川人志節慷慨補新息長民貧多不養
子彪嚴為其制與殺人同罪數年人養子千數僉曰
賈父所長生男名曰賈子生女名曰賈女兄弟三
人並有高名而彪最優天下稱曰賈氏三虎偉節最
怒

魏志賈詡字文和決機而破袁紹以謀而離韓遂馬超

天下之論智計者歸之算無遺策經達權變其後
為太尉

賈逵字梁道為豫州刺史二千石以下阿縱不如法者
皆舉奏免帝曰逵真刺史矣布告天下當以豫州為法
父造陂通渠所謂賈侯渠

晉書賈充字公閭頗好進士每有所薦逵必終始經緯
之子謚充弟混

賈足字彥度器望甚偉見者莫不悅附

忠義賈渾為介休令

南史賈希鏡家傳譜學凡十八州士族譜該究精悉皆如貫珠

孝義賈恩母喪為隣火所逼恩及妻栢氏奔救棺櫬得免恩及妻燒死改其里為孝義里蠲租布三世

北史賈彞字彥倫父繫獄彞年十歲詣長安訟父獲申遠近嘆之僉曰此子英英賈誼之後莫之與京道武拜為尚書左丞參預國政

賈思伯字士休累遷中書侍郎頗為孝文所知初與弟思同師北海陰鳳業竟無資酬之鳳遂質其衣物語曰陰生讀書不免癡不識雙鳳脫人衣轉衛尉卿上明堂議學者善之

賈顯度中山人孝武時除左僕射後為雍州刺史

唐賈曾河南人父言忠貌魁梧高宗擢監察御史曾少有名玄宗為太子遴選官僚以曾為舍人俄擢知制誥與蘇晉同掌皆以文辭稱時號蘇賈

賈至字幼隣擢明經第從玄宗幸蜀知制誥帝傳位至
當讓冊既進藁帝曰昔先天誥乃父為之今慈命冊
又爾為之兩朝盛典出卿家父子可謂繼美矣

賈耽字敦詩滄州人舉明經汾州刺史治凡七年政有
異績為山南西道節度使以右僕射同平章事最嗜
觀書老益勤

賈島字浪仙初為浮屠後舉進士當其苦吟雖逢直公
卿貴人皆不之覺一日見京兆跨驢不避呼詰之久

乃得釋

賈餗字子美河南人策賢良方正異等美文辭開敏有
斷歷禮部侍郎凡三典貢舉得士七十五人多名卿
宰相

賈循京兆人父會有高節里中號一龍親亡負土成墳
廬其左號闕中曾子卒縣人私謚曰廣孝徵君賈循
有大略蘇頲嘗謂今頗牧

賈直言父道冲以藝待詔直言署李師道府屬師道不

軌負棺入諫師道怒囚之劉悟入釋之悟每有過必爭之故能以臣節光明於朝穆宗召為諫議大夫嘗折劉從諫之反

賈敦頤曹州人貞觀時數歷州刺史資廉潔入朝常盡室行車一乘敝甚羸馬繩羈道上不知其刺史也徙瀛州州瀕滹沱滹二水歲溢溢壞室廬為立堰塘百姓利之弟敦實為饒陽令政清靜吏民嘉美遷洛州發姦摘伏下無能欺為政寬惠人心懷向始洛人為

敦頤刻碑大市旁及敦實復為立碑其側故號常棣碑

宋朝賈黃中字媯民滄州南皮人也唐相耽四世孫黃
中年六歲中神童十五舉進士江南平知宣州太宗
即位知昇州一日黃中按行府庫見扁鐫甚嚴集僚
吏發之得寶貨數十積皆李氏宮闈之物不隸於籍
者黃中悉表上之太宗歎曰吾府庫之物有籍貪黷
者尚冒禁盜之況此亡國之餘物乎賜黃中錢三十

萬以旌其潔召還知制誥遷翰林學士太宗多召見訪以時政得失對曰職當書詔思不出位太宗益重淳化二年除給事中參知政事太宗召見其母王氏命之坐謂曰教子如是今之孟母也黃中性端重守家法多知臺閣故事朝之典禮資以損益當時之名士皆出其門談論娓娓聽者忘倦

賈昌朝字子明真定人也曾祖緯為史官官至給事中五代史有傳天禧元年昌朝獻文章于朝召試除晉

陵簿國子監說書時孫奭判監一見許以公輔景祐
元年初置崇政殿說書以授昌朝而天章閣侍講亦
自昌朝始在經筵善稱說仁宗多所質問昌期皆記
錄刪潤以進賜名邇英延議二閣記注錄英宗即位
改鳳翔節度使加左僕射進封魏國公徙許州以疾
求解將相復為右僕射觀文殿大學士判都省薨謚
文元子炎徽宗時為工部侍郎方昌朝始見孫奭
奭以唐路隋韋處厚傳示之謂昌朝曰知此意否君

異日以儒術作宰相正如此二人世以謂爽能知人
賈黯字直儒南陽人也舉進士第一為將作監丞通判
襄州嘉祐中入翰林為學士久之遷給事中權御史
中丞時用呂誨為御史知雜誨以嘗言黯過失辭職
黯奏曰諫官御史本為人主耳目況一時公言非有
嫌怨且誨初得御史乃臣與孫抃薦舉臣知其為人
方正謹厚今茲擢用甚允衆望臣得與之共事必能
協濟詔以諭誨誨遂就職時人莫不賢黯也以疾乞

郡除翰林侍讀學士知陳州卒 黯有學識好脩潔
無所阿附初登第還南陽范仲淹知鄧州黯謝仲淹
曰黯晚輩偶得科第願受教仲淹曰君不憂不顯唯
不欺二字可終身行之黯拜其言其後黯每以語人
曰吾得於范公不欺二字平生用之不盡也

夏七百八

姓慕夏后氏之後以國為姓又陳宣公孫御叔亦為
夏氏徵舒其後也

後漢夏馥字子治少為書生言行質直同縣高氏蔡氏
並皆富植比門不與交通後與范滂張儉俱為黨魁
文苑夏恭字敬公習韓詩孟氏易門徒常千餘人光
武時遷太山都尉和集百姓甚得歡心

晉書孝友夏方字文正會稽人廬墓植松柏烏鳥猛獸
馴擾其旁除高山令百姓有罪應加捶撻者方向之
涕泣而不加罪大小莫敢犯焉

隱逸夏統字仲御會稽人養親以孝聞睦於兄弟常甘

辛苦於山林畢性命於海濱不辱身曲意於郡府之
間

宋朝夏竦字子喬江州德安人也其父承皓太宗時上
平晉策補右侍禁後與契丹戰沒于河朔竦以死事
恩授丹陽簿上書乞應舉制其略曰邊將多故羽書
旁午而先臣承皓殞身行陳陛下錄臣孤幼任之州
縣唯陛下辭而明之陛下以枕石漱流為達則臣世
居市井陛下以金榜丹桂為材則臣未忝科第陛下

以鳩杖鮐背為德則臣始踰弱冠陛下以荷戈控弦
為勇則臣生無綿力若陛下令臣待詔公車條問急
政對揚紫宸指陳時事猶可與漢唐諸儒方轡並馳
而較其先後矣真宗頗嘉之既中制舉擢光祿寺丞
通判台州召入為直集賢院遷右正言真宗幸亳州
為東京留守推官仁宗封慶國公宰相王旦薦竦才
遂命教慶國公書未幾同備起居注知襄州歲饑
發公廩募富人出粟嘗全活人數萬徙壽州歷安洪

二州洪俗信巫有疾輒屏去親屬凡飲食衣藥悉聽於神死者甚衆竦索部中得巫一千九百餘家毀其淫祀以聞時奉使契丹竦辭不行其表有父沒王事身丁母憂義不戴天難下穹廬之拜禮當枕塊忍聞蕃樂之聲等語當時謂其四六為精絕明年為翰林學士兼侍讀又兼龍圖閣學士遂拜右諫議大夫樞密副使遷參知政事與宰相呂夷簡不協改樞密副使累遷尚書左丞京師無雲而震者五仁宗召翰

林學士張方平謂曰夏竦姦邪以致天變如此宜早
制出之遂罷知河南府皇祐元年加侍中移鎮武寧
改封鄭國公明年以疾求歸卒于京師謚文莊其子
安期官至龍圖閣直學士竦舉制科對策庭下有
老宦者曰閱人多矣賢良他日必貴以吳綾手巾乞
詩公題曰殿上衮衣明日月視中旗影動龍蛇縱橫
禮樂三千字獨對丹墀日未斜楊徽之歎曰真將相
器也初除館職時方早秋上在拱宸殿按舞命中使

索新詩公立進喜遷鶯曰霞散綺月沉鈎簾捲未央
樓夜涼河漢截天流宮闕鏤新秋瑤堦曙金莖露鳳
髓香和雲霧三千珠翠擁宸游水殿按涼州上大悅
策七百九

姓纂本姓棘棘子成之後因避地改焉後漢有棗祗
晉文苑棗據字道彥潁川人父叔偉魏鉅鹿太守據
為山陽令有政績遷尚書左丞子腆字玄方亦以
文章顯為襄城太守弟嵩字臺產才藝尤美為太

子中庶子

魏棗祗初為羽林監請建置屯田曹操以為屯田都尉募民屯許下得穀百萬斛無運糧之勞軍國之饒

起於祗

見通鑑

老七百一十

風俗通云顓頊子老童之後或云老氏老聃老萊子之後

保七百十一

周禮保章氏因官為姓呂氏春秋云楚有保申

昊
七百十二

風俗通云昊英氏之後一云少昊之後也

皞
七百十三

蜀錄有皞氏

浩
七百十四

漢書青州刺史浩賞

左
七百十五

姓纂齊公族有左右公子因以氏焉魯左丘明楚左史倚相

後漢左雄字伯豪為冀州刺史州部多豪族好請託常閉門不與交通奏按貪猾二千石無所回避拜尚書遷尚書令陽嘉元年上疏曰昔宣帝以為吏數變易則下不安業久於其事則民服教化其有政治者輒以璽書勉勵增秩賜金公卿缺則以次用之是以吏稱其職民安其業漢世良吏於茲為盛今典城百

里轉動無常各懷一切莫慮長久帝感其言復申無
故去官之禁

左慈字元放廬江人少有神道後曹操欲殺之卻入壁
中霍然不知所在

晉左思字太冲家世儒學貌寢口訥而辭藻壯麗作三都
賦十年而成豪貴競傳寫洛陽為之紙貴思自以其
作不謝班張含毫歷載以賦三都高步當年騰華
終古

我七百十六

風俗通云我子六國時人著書號我子

將七百十七

姓纂周公第三子伯齡封蔣子孫氏焉國在汝南期
思縣宋改為樂安漢有蔣詡蔣朗

魏志蔣濟字子通文帝時出為東中郎將濟請留詔曰
天下未寧要須良臣以鎮邊境如其無事乃還鳴玉
未為後也濟兼資文武志節慷慨常有超越江湖吞

吳會之志母軍國大事輒有奏議忠誠奮發吾甚壯之

蜀志蔣琬字公琰零陵湘鄉人弱冠知名除廣都長先主見琬衆事不理時又沉醉大怒諸葛亮曰蔣琬社稷之器非百里之才也其為政以安民為本不以脩飾為先楊敏曾毀琬曰作事憤憤誠非及前人子斌嗣為綏武將軍

吳志蔣欽字公奕九江人徐盛有嫌於欽而欽每稱其

善曰豈敢挾私恨以蔽賢乎

南史蔣恭義興人見孝義傳

北史藝術蔣少游性機巧頗能畫刻後除都水使者
兼將作大臣

唐蔣儼常州人擢明經太宗將伐高麗募為使者人皆
憚行儼奮曰云云遂請行為莫離支所囚以兵脅之
不屈進蒲州刺史號良二千石

蔣欽緒萊州人擢進士第遷太常博士中宗親郊欽明

言皇后亞獻欲以媚韋氏欽緒抗言不可諸儒壯其節精治道馭吏整嚴

蔣沆欽緒子博學有名以孝廉授洛陽尉與兄演溶弟清俱為才吏有名乾元中歷四縣令善政流行郭子儀軍出其縣敕麾下曰將沆賢令毋撓其清也遷大理卿持法明審號稱職

蔣乂字德源常州人性銳敏七歲時見庾信哀江南賦再讀輒誦外祖吳兢位史官乂幼從學得其書博覽

彊記逮冠該綜群籍有史才楊綰尤稱之父蔣明在
集賢值兵興圖籍殽舛白宰相請引乂入院助力張
鑑奇之署集賢小職貞元九年擢史館脩撰德宗
重其職先召見延英遷起居舍人帝前口誦補侍
臣圖贊帝歎曰雖虞世南不是過也條據神策軍建
置本末高郢等歎曰集賢有人哉詔兼判集賢院事
父子為學士儒者榮之其在朝廷久居史職二十年
每有大政事宰相未能決必咨訪之疏裴延齡罪惡

及拒王叔文當世高之子係伸偕

蔣係善屬文得父典實太和初授昭應尉直史館拜右
拾遺

蔣伸字大直第進士後為兵部侍郎宣宗雅信愛母見
必咨天下得失

蔣偕歷史館脩撰三世踵脩國史世稱良筆咸云蔣氏
日歷

宋朝蔣堂字希魯常州宜興人也舉進士為楚州團練

推官嘗知臨川縣通判眉州久之知泗州召拜監察御史遷侍御史禁中火有司請究火所起多引宮人屬吏堂言陛下宜責躬脩德以應天變豈可歸咎宮人邪殆非所以畏天譴也仁宗於是悲赦原之坐失按舉降知越州州有鑑湖溉田八千頃前此為郡者聽民自占既而多為豪右所侵有害水利堂乃條上所不便奏復之徙蘇州入為鹽鐵副使安撫梓夔路拜天章閣待制制置發運使知洪州應天府又知

杭州卒

蔣之奇字頴叔常州宜興人也舉進士又舉賢良方正
科試六論祕閣及射策報罷除監察御史英宗立為
殿中侍御史初之奇游歐陽脩之門脩主濮議之
奇盛稱之及是以浮語彈脩問狀無實出監道州稅
改宣州而之奇遂為清議所非新法行為福建路轉
運判官遷淮東路轉運副使歲饑募民興水利以食
流者溉田九千餘頃如揚之天長三十六陂與宿之

臨漁橫斜三溝此其大者也又為江西河北陝西轉運副使之奇在陝西輕賦入以給用度公私用足比其去庫繕八十餘萬邊粟皆支二年移淮南擢江淮荆浙等路發運副使元豐六年漕六百二十萬石至京師始建鑿泗州股渠以避長淮之險自是無覆溺者矣哲宗立除直龍圖閣遷發運使拜天章閣待制知潭州徽宗即位復為翰林學士拜同知樞密院事進知院事崇寧元年除觀文殿學士知杭州俄奪

職以疾告歸提舉靈仙觀卒之奇為部使者十二任
六典會府所至以治辨稱季子堦官終徽猷閣待制
生五男及祖之子芾字子禮卒未趙達榜進士第二
人登第乾道間為宰相

忠義蔣興祖之奇之孫也

蕩七百十八

宋桓公子子蕩生公孫壽生蕩意諸以王父字為氏

黨七百十九

左傳晉大夫黨氏之後

廣 七百二十

風俗通云廣成子之後

掌 七百二十一

魯大夫黨氏之後音掌晉有琅琊掌同燉煌前涼有

遂興侯掌

養 七百二十二

楚有養由基孝子傳有養奮梁有養彭舒

强七百二十三

符秦錄有强永强帛姚秦有强超
强斌西陽侯强京並
略陽志也

放七百二十四

尚書堯臣放齊

名賢氏族言行類稿卷三十九

名賢氏族言行類稿卷三十九